





宋開寶

山豆根。氣味甘寒。無毒。主解諸毒藥。止痛消瘡。毒腫。除發熱欬嗽。治人及馬。惡黃。殺小蟲。

覈曰。出劍南宜州果州。及廣西忠州萬州。莖蔓如大豆。葉青翠。經冬不凋。廣南一種如小槐。高尺許。石鼠啖其根。捕取者收其腸胃暴乾。用以解毒攻熱。云甚効。

叅曰。宣散氣生曰山。食肉皿器曰豆。蓋言受

納腐化者胃也。一名黃結。以病狀言。一名中藥。以功用言。種種功用。種種病狀。悉從中樞散宣生氣。所謂解從結心。解卽分散。



宋開寶

密蒙花。氣味甘平。微寒。無毒。主青盲。膚騃赤腫。多眵淚。消目中赤脈。及小兒疳氣攻眼。

覈曰。出蜀中州郡。利州甚多。木高丈餘。凋冬不凋。葉似冬青而厚。柔而不光。潔而淺綠。背有白毛。花細碎。數十房成一朶。冬生春放。色微紅紫。二三月采取。暴乾用。修事。酒浸一宿。漉出候燥。潤蜜令透。蒸之。從卯至酉。日乾。再

潤蒸晒。凡三次。每花一兩。用酒半兩。蜜半兩  
爲度。

叅曰。冬季孕萼繁密。春仲作花錦簇。先君云。  
具冬營夏榮之序爾。開寶陳列諸證。咸屬肝  
木失序。致令目眚自成。妄生節目。密蒙象形。  
對待治之。說文云。瞳蒙曰矇。有目無眸也。周  
禮云。樂師有瞽。矇目不明。禮記云。昭然若發  
矇矣。此以功用爲名也。

威靈仙。氣味苦溫。無毒。主諸風。宣通五藏。去腹  
內冷滯。心膈痰水。久積癥瘕。疝癖氣塊。膀胱宿  
膿惡水。腰膝冷疼。療折傷。久服無有溫疾瘧。

覈曰。出商州上洛山。及華山平澤。今陝西河  
東河北。汴東江湖州郡皆有。生處不聞水聲。  
者良。生先衆艸。初起作蔓。莖如釵股而四稜。  
葉如楊柳而層疊。每層六七葉。環列如車輪。

七月開花六出。淺紫色。或碧白色。作穗似蘭臺子。及菊花頭狀。實青色。根稠密。多鬚似穀。歲必敗朽。次年芻引生苗。年久轉茂。一根叢鬚數百條。長二尺許。九月采根。濕時色黃黑。乾時色深黑。俗呼鐵腳威靈。別有一種。根鬚都一樣。根色黃。或白者。並不堪用。修事陰乾月餘。搗末篩過。用忌茗及麩汁。

叅曰。有威可畏。有靈可通。僊化遷變。以爲體。



用者也。味苦氣溫性秉風火。風得之而作。夏  
脉得之而流行。宣發陳通。橫徧空所有。實所  
無。急方之宣劑通劑也。先人云。威武靈奇。仙  
趣也。其性快。其効速。其力峻。其禍深。如商君  
之治秦。立徙木之命令。朝示而夕行者也。故  
主久疲宿冷之痼疾。元陽委頓。猶貫朽粟紅。  
但少設施者。藉此便成大觀。倘兵柔餉乏。作  
此背水陣。終非萬全策耳。

豎窮三際。橫徧十方。空諸所有。實諸所無。方盡得僊化。遷變神運。無方之妙用。

朱開寶

甘松香。氣味甘溫。無毒。王惡氣。卒心腹痛滿。下  
氣。

覈曰。甘松香。金光明經謂之苦彌哆。出姑臧  
涼州諸山。今黔蜀州郡。及遼州亦有。葉細如  
茅。引蔓叢生。根極繁密。八月采根。作湯沐浴。  
令人體香。用合諸香。及以裛衣。

叅曰。臭味如松。香艸也。宜入脾。脾味甘。脾臭

香。脾之陽分用藥也。功奪土鬱。土鬱則奪之。  
行土用也。繇是天氣明。地氣清。土位乎中而  
暢于四支。美之至者也。

地氣冒明。祇須降濁。濁降則明  
體自著。若欲升清。反致濁矣。



宋開寶

續隨子。氣味辛溫。無毒。主婦人血結。月閉。瘀血。癥瘕。疝癖。除蠱毒。鬼疰。心腹痛。冷氣。脹滿。利大小腸。下惡滯物。

覈曰。續隨。卽千金子。拒冬。聯步。菩薩豆也。所在俱有。南中尤多。入藥以南產者爲勝。苗如大戟。初生一莖。葉在莖端。葉復生莖。莖復生葉。轉展疊加。宛如十字。作花亦類大戟。但從

葉中抽幹。並結實耳。修治去殼。取其色白者。綿紙包裹。壓去油用。

先人云。嘗見半枝蓮葉上生葉。儼如十字。春分葉中抽莖。莖必三之。葉如蓮瓣。裹莖而上。入夏開花作實。實必三稜。子必三粒。外肉青軟。子殼則堅。上半黑褐。下半黃白。內仁如玉。溫潤如脂。土人稱半枝蓮。用治蛇虺螫蠍之毒。立有奇驗。讀宋開寶。始知卽續隨子也。

叅曰續隨子葉中出莖以莖之一合葉之二  
奇連偶斷其數三也春半葉中抽莖夏半實  
作三稜列子三粒莖只三之葉只二之次第  
重之生復續續復隨三相參五相伍生道無  
端唯數可倚而不可違也如營衛周行行必  
有紀行周不息如環無端生氣乃治自無血  
結目閉瘀血癥瘕營行失于隨續之眚矣亦  
無疝癖蠱疰冷氣脹滿衛周失于隨續之眚

矣。續隨辛暢溫燁。維數可倚。周行不息。仍不  
違于嘗數之紀爾。

以莖之一。合葉之二。爲剛來  
而下柔。動而說。隨從之象也。



宋開寶

蓬莪茂。氣味苦辛溫。無毒。主心腹痛。中惡。疰忤。鬼氣。霍亂。冷氣。吐酸水。解毒。食飲不消。酒研服之。又療婦人血氣結積。丈夫奔豚。

覈曰。生西戎。廣南諸州。江浙或有之。三月生苗。在田野間。莖如錢大。高二三尺。葉色青白。長一二尺。大五六寸。頗類蘘荷。五月黃花作穗。花頭微紫。根如生薑。而茂在根下。狀如雞

鴨卵。大小不一。好惡。金生。惡者有毒。西人取之。先放羊食。不食者。棄之。陳藏器云。一名蓬莪。黑色。二名莛。黃色。三名波殺。味甘。有大毒也。修事。九月采。莪削去粗皮。蒸熟。暴乾。臨用時。于沙盆中醋磨令盡。然後火畔煖乾。重篩過用。

叅曰。蓬莪茂。惡草。莪也。根形如卵。好惡。金生。惡者大毒。殺人。好者毒藥。攻疾。諧聲。逢我戍。

好者尤稱  
毒藥不得

若逢君之惡。取戈自持。擊傷以滅之也。氣味辛溫。對待冷惡。疰鬼爲因。變遷種種形證。非此入破。未易剪除耳。

開寶

貳頁



宋開寶

木鼈子。氣味甘溫。無毒。主折傷。消結腫惡瘡。生肌。止腰痛。除粉刺黥黯。婦人乳癰。肛門腫痛。

覈曰。出朗州。及南中。今閩廣諸郡。杭越全岳。亦有。蔓歲一枯。根則不死。春復旋生。亦可子種。種時須雌雄相配。紅繩紮定。排埋土中。及其生也。則去其雄。方結有子。作藤布葉。都似薯蕷。但葉作五稜。色稍嫩綠。四月黃華。六月

開寶  
壹頁  
結實。生時青碧。熟則紅黃。殼有軟刺。纍纍如  
苦瓜。錦荔枝狀。每一實有子數十枚。長三四  
分。圓扁礪砢。形狀如鼈。一頭尖者。雄種也。八  
月採取。中仁青綠。修事去油用。

叅曰。蔓艸曰木。以用言也。實核曰鼈。以形舉  
也。言能以踈洩爲已任。根身之結者則踈之。  
壅者則洩之。經云。肝主踈洩。寧獨二陰而已  
乎。



開寶

貳頁



本艸乘雅半偈

錢唐後學盧之頤子繇甫覈叅

法象

通脫木。氣味甘淡寒。無毒。主利陰竅。治五淋。除水腫癢閉。明目。瀉肺。

覈曰。出江南。生山側。高丈餘。如革麻狀。花上有粉。莖中有瓢。輕白而柔。女工用以飾物。不知起自何世。漢王符潜夫論。固已譏花采之

費。至梁宗懔。記荆楚之俗。四月八日。有染絹  
爲芙蓉。捻蠟爲菱藕。亦未有用此物者。今則  
通行于世矣。或作蜜煎充果。食之甘美。俗呼  
通艸。

叅曰。艸類木狀。白瓠理通而輕脫也。木乘金  
制曰倚。金體用行曰商。受前此之木。生後此  
之金。離南而轉西矣。蓋通因塞用。脫因濇用。  
木司陰竅。肝所主也。故主利陰竅。治五淋。除

水腫下乳。催生解諸毒。蟲疔耳。明目者。一。這  
其木竅。瀉肺者。洩肺之金鬱。金鬱則洩之。解  
表利小水也。然則洩金之用。正所以輔金之  
體。行木之用耳。別名倚商。離南者。以此。

法象

貳頁



本艸乘雅半偈

錢唐後學盧之頤子繇父覈叅

補遺

紅麴氣味甘溫無毒主消食活血健脾燥胃治赤白痢下水穀。

覈曰用白粳米一石五斗水淘浸一宿蒸之成飯分作十五處入麴母三斤搓揉令勻復併作一處遂以帛密覆之熱卽去帛攤開覺

微溫。遂復堆起。又以帛密覆之。次日日中。又分作三堆。越一時。分作五堆。再一時。復合作一堆。過一時。又分作十五堆。俟稍溫。又復合作一堆。如此數次。乃止。至第三日。用大桶盛新汲水於桶內。以竹籬盛麴。分作五六分。水中蘸之。完時。又作一堆。仍如前法。作一次。第四日。如前。又蘸。若米半浮半沉。仍如前法。作一次。復蘸之。米盡浮。則麴成矣。取出日乾收。

之其米過心赤者謂之生黃未過心者不  
入藥。陳久者良。

叅曰。稻之不黏者爲秔。米粒如霜。性尤宜水。  
漑種之穀也。鬱之使塵華爲赤。過心者赤心。  
爲大赤。法出近世。亦奇術也。金穀曰秔。性宜  
水者。卽金向水求。胎藏水母中也。易以坎爲  
水。爲赤。乾爲金。爲大赤。顧穀之能爲赤。爲大  
赤者。其唯稻之秔乎。藉金水以相資。亦非本

有之形色。假人力而成者也。故女工曰紅。紡績織紝。功力之謂也。鬱稂造麴。使之衣生。令之心赤。亦孰非功力之使然乎。是故穀入于胃。乘中黃之生氣。升出之。降入之。奉心化赤。乃得流溢于中。布散於外。精專者獨行其經隧。嘗營無已。終而復始也。設中黃生氣息。則升出降入廢。上焦亦不爲之開發。五穀亦不爲之宣味。水食亦不消。血凝亦不流。胃濡脾



憊停而成飲矣。畱于中則爲蠱。溢于外則爲腫。注于下則爲淋。爲帶爲痢矣。稻稭鬱之爲赤。爲大赤。巳若奉心化赤矣。則從前生意巳成其終。餌之以赤。以大赤。嗣後生意寧不以成其始乎。誠金胎水中爲先天。木藏火裏爲後天。孕育之基。中黃戊巳也。合物我爲互交。分成兩象者。復還圓相矣。

致飲之因。變生之證。從來未經發覆。能于此比量推廣。法不可勝用矣。若祇作紅麴

叅。失却許多看書法門。

仲淳繆先生爲人處方。每脾胃疾。必多用

紅麴。又嘗見先生酒後。次早單以此種

作丸。必大啖之。庚申中秋。曾與頤言。白朮

蒸罨。變赤而成麴。如水穀醞釀。化赤而爲

血。其主脾胃營血之功。有同氣相求之感。

本艸乘雅半偈

錢唐後學盧之頤子繇父覈叅

會編

蟲白蠟。氣味甘溫。無毒。王安五藏。美毛髮。生肌。止血。續筋。接骨。補虛。定痛。

覈曰。蟲白蠟。蠟蟲營造女貞木上者也。出川滇。衡永者力勝。土人多種之。卽名蠟樹。狀似凍青。負霜葱翠。振柯凌風。因名女貞。其蟲嫩

則色白造蠟。秋深老則紫赤。遺卵作房。營結  
枝畔。形如黍粟。入春則漸大如豆。如芡。纍纍  
盈枝。若雀窠。螵蛸之類。卽名蠟種。亦曰蠟子。  
內有白卵如虬。一包數十百。立夏後逐枝摘  
取。分繫各樹。越芒種。接夏至。包拆蟲生。延緣  
枝莖間。吮液吐涎。狀如凝霜。處暑剝取。名曰  
蠟渣。過白露粘牢難落矣。采得煉化。濾清。或  
甑蒸。滴瀝磁器中。俟冷作塊。蠟成矣。辛巳五



月常州郡邑菽荳類盡爲青蟲所啖八月掘地每株根底獲蟲數十條長四五寸重三四兩。殭白如脂。燒之都成白蠟。父執周湛翁目擊其異。囑筆以紀之。

先人云。女貞之液。蟲腹醞釀。復從口吐。秋成色白。宛如肌腠肉理之脂膏。則凡風毒流溢于外者。莫良於此。

叅曰。乳卵于女貞。造蠟于枝上。成始于陰姤。

成終于大觀。稟女貞木氣之專精。與入在中。速于敷化。故主居中之神室。散精于五藏。淫氣于五形。五形者。五藏之所合也。自外合內。繇內合外。維中不息之生機。功勝女貞實矣。

羽毛。裸鱗介。總呼為蟲。物入陰中。色剝為白。退藏合密。敷化為蠟。精神。鬼。鬼。意。為五神。心。腎。肝。肺。脾。為五藏。皮毛。血。肉。筋。骨。為五形。腎藏精。骨者。腎之合也。肝藏魂。筋者。肝之合也。脾藏意。肌肉者。脾之合也。心藏神。血脉者。心之合也。肺藏魄。皮毛者。肺之合也。五月為陰。

剝。八月為大觀。

本艸乘雅牛偈

錢唐後學盧之頤子繇父覈祭

蒙荃

秋石。氣味鹹溫。無毒。主滋腎水。養丹田。返本還元。歸根復命。安五藏。潤三焦。消痰欬。退骨蒸。軟堅塊。明目清心。延年益壽。

覈曰。製煉秋石。爲丹家秘法。世所鍊者。皆渣魄。不堪用也。其法。宜秋月取。用人尿二三石。

入鍋內。桑薪緩緩煎收。勿使鍋岸生塗。有則竹刀掠下。或沸滾泛溢。亦以竹枝頻攪。遂定。俟乾成滓。卽去薪。緩火焙燥。分置陽城罐上。餘空二寸許。蓋覆磁盞。封固罐口。養火一周。其藥漸生。輕盈如雪。瑩潔可愛。或成五色。或象物形。此屬上乘。宜密貯銀瓶。藏陰靜處。不則風化成水。復須升養。仍結如霜。但少堅實爾。又製旣濟玄黍秘法。選端潔童男女。各認



溺器各陸續取溺煎煉成滓各升取上乘秋石各取溺器白塗晒焙令乾先置女塗于銀釜之底次置男秋石于女塗之上次置女秋石于男秋石之上次盪男塗于女秋石之上次第安置上餘二寸六一泥封固三方火溫養七日則粒粒丹紅交結釜頂此更屬無上乘藏貯亦如秋石法。

叅曰物熟曰秋石言量也。溺緣潤下水藉火



大既濟而允升。培後天之形藏。副先天之神藏者也。故諸證咸從形藏生。力轉神藏仍與形藏俱。若玄黍爲陰陽合璧。復還圓象。使得盡終其天年。度百歲乃去。

本艸乘雅半偈

錢唐後學盧之頤子繇父覈叅

綱目

大風子。氣味辛熱。有毒。主風癬疥癩。楊梅諸瘡。攻毒殺蟲。

覈曰。出海南諸番國。真臘記云。大風。大樹之子也。狀如椰子而圓。包核數十枚。形如雷丸。去其衣。中仁白色。久則黃敗而油。不堪入藥。

矣。

叅曰。風從凡。從蟲。風入八日而成蟲也。陳列  
諸疾。皆風動蟲生之患。緣因風動。仍因風化。  
大風子。秉金剛之味辛。煖熱之火化。釋典云。  
太末蟲。無界不到。能延于太虛之際。不能延  
于火焰之上。

風者。百病之長也。百蟲之祖也。  
大塊之噫氣。王者之聲教也。

綱目

蜀粟。氣味甘。澹平。無毒。主溫中。澹腸胃。止霍亂。粘者與黍米同功。根煮汁服。主利小便。止喘滿。燒灰酒服。主產難。

覈曰。蜀粟。卽高粱。廣雅謂之木稷。又謂之荻梁。食物謂之蘆稌。俗謂之蘆粟。又謂之蜀秫。者是也。種始自蜀。因名蜀黍。北人多種之。以續絕乏。宐下濕地。春月布種。秋月收采。莖高



丈許。狀如蘆荻而內實。葉如蘆穗而稍肥。粒如椒子而堅硬。粘者釀酒。秔者炊粥。可以濟荒。可以養畜。梢堪作筵。莖堪織席。編籬供爨。大益民生者也。

叅曰。黍爲心穀。蜀黍色赤氣溫。又屬手太陽小腸心之府藥矣。小腸府主泌水穀。調水道輸膀胱。傳穀臍下大腸。水穀旣分。霍亂遂定。喘滿立止。溫中之驗也。根荻燒灰。主產難者。



太陽府主開通調傳送正屬開所司爾

乘雅

蜀粟

月樞閣



綱目

玉蜀粟。氣味甘平。無毒。主調中開胃。根葉。氣味甘寒。主小便淋瀝沙石。痛不可忍。煎湯頻飲。

覈曰。玉蜀粟。別名玉高粱。卽今之御粟也。種出西土。近所在亦有之矣。苗葉類蜀黍而肥。又似薏苡而長。六七月開花成穗。如秕豆狀。苗心出苞。如椶魚狀。白鬚四垂。久則苞裂子出。攢簇如珠也。

叅曰。中秋出子。悅澤如珠。稟金水之英華。安  
入肺與腎。輔先天之生氣者也。故司後天之  
穀府。主調中而開胃。開竅于二陰。治淋瀝沙  
石。痛不可忍也。蓋腎主谿。是知其病之在骨。



綱目

山柰。氣味辛溫。無毒。主暖中。辟瘴厲惡氣。治心腹冷氣痛。寒濕霍亂。風蟲牙痛。入合諸香用。

覈曰。時珍云。出廣中。人家亦多種蒔矣。根葉如薑。作樟木氣。土人食其根。如食薑云。切斷暴乾。皮赤肉白。古之所謂廉薑。恐其類也。酉陽雜俎云。柰祇出佛林國。長三四尺。根大如鴨卵。葉長如蒜薤。中心抽莖甚長。莖端開花。



六出色紅白。心黃赤。不結子。其艸冬生夏死。取花壓油塗身。去風氣。按此說頗似山柰。故附之。

叅曰。山宣也。柰。遇也。味辛氣溫。臭香且辛也。對待寒中諸證者。宣散中黃之生氣。辟除瘴厲之死氣耳。

宣氣散生。產生萬物者。山也。死陰之氣。奚奈何。

綱目

淡竹葉。氣味甘寒。無毒。葉主去煩熱。利小便。根能墮胎。催生。

覈曰。所在田野俱有。春生苗。高數寸。莖小葉綠如竹。宛如竹米落地。所生形色。但柔嫩爲異耳。八九月作穗細長。一窠數十鬚。鬚上結子。類麥門冬根而堅硬。里人采其根苗。搗汁造麴釀酒。殊芳烈也。

叅曰淡非濃比。滔淡水盈貌也。對待急疾如  
火。肺熱葉焦爲煩熱。爲癰閉。葉可走之。利之。  
根能墮胎催生。太陰肺主開闔者。闔之急方  
洩劑也。

綱目

紫花地丁。氣味苦辛寒。無毒。主一切癰疽發背。  
丁腫癰癧。無名腫毒。惡瘡。

覈曰。處處有之。壽州者爲勝。春生苗葉似柳  
而微細。夏月開花紫色。結實成角。出平地者  
成莖。生溝壑者作蔓。又一種生籬落間者。葉  
如木樨花葉。花如鈴鐸下垂。小而色白。今人  
稱作白花地丁。與紫花並用。功力垂戾。不可



不辨

叅曰。丁爲奔火。地在氣中。順承天施而成物者。地也。故三才骸地屬。失承天施。爲癱。爲丁。爲瘰。爲癩。使之仍順乎天施。而暢於四肢。美之至者也。